



1. april 2020

XM2020/18

Paninguak M. Kruse

Uunga siunnersuut: Nappaatit tunillaassortut akiorniarlugit iliuitsit pillugit Inatsisartut peqqussutaata allangortinneqarnera pillugu Inatsisartut inatsisissaat nr. xx, xx.xxx-imeersoq. (Tunillaassuinerup pinaveersaartinniarnernani siaruarnaveersaartinniarnernanilu aamma sullissiniarnermi pisariaqartitat il.il. qulakkeerniarneranni iliuseqartoqarsinnaanermut annertusaaneq)

(Isumaginninnermut Inatsisinillu Atuutsitsinnermut Naalakkersuisoq)

Naammagittarnerujussuaq tamatta massakut ilinniaqqipparput. Eqqaasinneqarpugut ilaqttagut, qanigisagut ikinngutigullu ulluinnarni qanoq annertutigisumik sunniuteqartigisarnersut, qanorlu pisariaqartitsiginerigut. Paasilerunarpullumi ulluinnarni atukkagut iluarusuutigisavut pitsaasut, taamaaginnartussatullu isigisavut qujamasuutiginerusariaqarigut.

Eqqaasinneqarpugut inuiattut qanoq ataatsimuullaqqitsiginersugut pisuni ilungersunartuni. Eqqaasinneqarpuq inoqateqartugut ulluinnarni inuunermik ingerlatsinissamut artorsaateqartunik, meeraasalu pisariaqartitaannik tamakkiisumik tunniussaqaarsinnaanngitsunik. Inoqateqarpugut akisussaaffimmik tigusinissaminut suli piareeqqanngitsunik, piffissamilu massakutut ittumi pisussaaffimminnik naammassinnissinnaanngitsunik.

Oqaaqqissaariuarsinnaagaluarpuq inoqatitsinnut, taamaattorli pisariaqalersimammat tamatta peqqinnissarput pillugu inatsisitigut sukaterinissaq pisariaqalersimavoq. Immitsinnut inoqatitsinnullu inimisussinnaaneq paarsilluarsinnaanerlu nammineerluta artorsimagatsigu inatsisitigut inuttut kiffaanngissuserput milliallatsittariaqalerparput, pisortallu pisinnaatitaaffii qaffallugit.

Kiffaanngissuseq pisussaaffiliivoq. Pisussaaffigulli eqquutsissinnaanngikkutsigit kiffaanngissuserput annikillartussaaq. Periarfissinneqarsimavugullu kiffaanngissusitta attatiinnarnissaanik. Inupparujussuuvugut peqqissaarluta mianersorlutalu pisortat innersuussutaannik malinnittuusugut, inoqativut eqqarsaatigalugit, sanngiitsortagullu illersorniarlugit. Inoqarporli inassutaasunik malinnikkumannngitsunik. Tamannalu tamatsinnut kinguneqarpoq.

Atassummiit paasilluarparput inatsisit sukaterneqartussanngormata Danmarkimi inatsisitigut allannguutit malillugit. Nukingertumik suliassaagaluatoq peqqissaarullugu suliarisariaqarparput mianersortumillu kiffaanngissutsip akisussaassusillimillu inatsisip sukaternissaa oqimaaqatigiissarlugit. Pisariaqarpormi



immitsinnut illersorniarluta asasagullu illersorniarlugit sukkanerusumik iliuseqapallannissamut inatsisitigut tunngavissaqalernissaq.

Ersarissumik Atassummiit oqaatigissavarput inatsisissatut siunnersuummi § 27-mi pigisanik arsaarinnissinnaanissamut pisinnaatitaaffiliinissaq (ekspropriation) sakkortuumik akerlileratsigu. Pissaaneq taamaattoq annertuallaarujussuarpoq, inuttullu kiffaangissutsimut kalluaarujussuarluni. Nappaassuarmulluunniit pisumullu allamut ilungersunartumut attuumassuteqalersillugu patsisigaluguluunniit atorneqassanngilaq.

Oqaluttuarisaanermi takuneqarsinnaavoq pissutsit ilungersunartut atornerlullugit pisortat pissaanerat annertusiartuaarsinnaasartog, inuiaallu kiffaangissusertik uterteqqinngitsoorsinnaasarlugu. Tamanna nunatsinni pinissaa qularnarsinnaagaluartog aamma mianersuutigisariaqarparput. Ajunnginnerpaamilluunniit siunertaqarsimagaluaaraanni nunarsuarmi ajunngitsumik siunertaqarluni ajornerpaamik iliuitsit pinngortarsimapput.

Taamaattumik uuma inatsisissap killilimmik ullulernissaa Atassummiit kissaatigivarput, naaffianilu aaqqissugassanngortinnagu atorunnaarsivinnissaanik ullulerneqassasoq. Siunissamilu pisussanut ilungersunartorsiorfiusussanut tulluarsakkamik peqqissaarussamillu suliassamik aallartitsisoqarluni.

Siunnersuut ataatsimiititaliamut innersuupparput.

Tamassi malinnaasusi immissinnut paarilluarnissassinnik kissaappassi. Tamatta akisussaassuserput erligigutsigu immitsinnut inoqatitsinnullu paarilluarta.